

四庫全書

子部

欽定四庫全書

子部
欽定協紀辨方書卷六

詳校官監察御史_臣邱庭澍

靈臺郎_臣倪廷梅覆勘

總校官知縣_臣楊懋珩

校對官主事_臣李廷敬

謄錄監生_臣陳廷桂

欽定四庫全書

欽定協紀辨方書卷六

義例四

三合

臨日

驛馬

天后

劫煞

災煞

天火

月煞

月虛

月刑

月害

大時

大敗

咸池

遊禍

天吏

致死

六合

無翹

兵吉

五富

天倉

天賊

要安

玉宇

金堂

敬安

普護

福生

聖心

益後

續世

血忌

九神總論

陽德

陰德

天馬

兵禁

地囊

土符

大煞

歸忌

往亡

氣往亡

上朔

反支

四離四絕

月忌日

三合



曾門經曰三合者異位而同氣也寅午戌火之三合巳酉丑金之三合申子辰水之三合亥卯未木之三合具日宜結會親姻和合交易修營起土立木上梁○歷例曰正月在午戌二月在未亥三月在子申四月在丑酉五月在寅戌六月在卯亥七月在子辰八月在丑巳九月在寅午十月在卯未十一月在辰申十二月在丑巳○考原曰三合者各與其月建會成三合局也

按子午為衝子未為害衝重於害也寅卯為類寅午戌

為合合必輕於類矣而不然者何也天之圓積氣也地之方積形也人者圓首方趾上圓下方而為三角實天地之心是故方圓之數必以三角為用以明天為大圓地為大方必由人之三角而神以著然則辰之三合固天地之道所由及於人之端歟三方既立五行以之終以之始四序以之生以之成一生二二生三三生萬物理之自然至粗而至精至近而至遠至微而至鉅至庸而至神其唯三合之義歟

臨日



樞要歷曰臨日者上臨下之義也其日忌臨民訴訟○
歷例曰臨日者正月午二月亥三月申四月丑五月戌
六月卯七月子八月巳九月寅十月未十一月辰十二
月酉○曹震圭曰臨者上臨於下也是陽建之使臣奉
上命以授百官者也建陽之月在三合前辰是臨於文
官官符也建陰之月在三合後辰是臨於武職白虎也
按三合前辰為定日三合後辰為成日定成三合固吉
陽順而前陰逆而後是為陰陽得位其義尤吉即配年

方而論定日為官符建前第四辰也成日為白虎建後
第四辰也官符為文白虎為武陰後而陽前左文而右
武也陽月前左取官符陰月後右取白虎別名之為臨
日蓋陰陽不得其位則官符白虎皆為害於人陰陽各
得其位則官符白虎皆為人除害者也是宜為臨民受
訟之吉占乃樞要歷以為忌者蓋誤也



驛馬

天后



神樞經曰驛馬者驛騎也其日宜封贈官爵詔命公卿
遠行赴任移徙遷居○李鼎祚曰驛馬者正月起申逆
行四孟○總要歷曰天后者月中福神也其日宜求醫
療病祈福禮神○歷例曰天后與驛馬同位○儲泳祛
疑說曰今世之所謂驛馬者先天三合數也先天寅七
午九而戌五合數二十有一故自子順至申凡二十有
一而為火局之驛馬亥卯未之數四六八合為十八故
自子順至巳凡十八而為木局之驛馬木火陽局也從

子一陽順行金水陰局也從午一陰順行故申子辰之數七九五合二十有一自午順至寅凡二十有一而為水局之驛馬巳酉丑之數四六八合為十八自午順至亥凡十有八而為金局之驛馬此驛馬之法所由起也○曹震圭曰驛馬者五行將病得見妻子似人值困途逢妻子者也假令寅午戌火也病於申申中有庚為妻戊為子故以申為馬申子辰水也病於寅寅中有丙為妻甲為子亥卯未木也病於巳巳中有戊為妻丙為子巳酉丑


金也病於亥中有申為妻壬為子也洞源經曰既病見子驛馬到來又曰天后者驛馬也五行受病得見妻子反有救助天后主生育萬物為萬物之母故以名之

按寅為功曹申為傳送亥為天門巳為地戶皆道路之象也三合在寅午戌則對寅之申有驛馬之象焉三合在巳酉丑則對巳之亥有驛馬之象焉又驛馬者不安其居之謂也數窮則變寅午戌之數盡而恰遇夫申則火將變而之乎水矣火生於木木絕於申而申又生水

以生木是火以變而不窮也已酉丑之數盡而恰遇夫
亥則金將變而之乎木矣金生於火土火土絕於亥而
亥又生木以生火是金以變而不窮也申子辰亥卯未
倣此易稱乘馬班如用拯馬壯皆以舍舊圖新改過遷
善為義故驛馬又曰天后亦絕處逢生之意也若洞源
經所謂既病見子驛馬來者則以申為火病已為木
病以見驛馬即是三合病鄉聊以識之耳猶三煞為太
歲三合絕胎養之類恰遇其方即用以為記而非於病

絕胎養有所取義也於此穿鑿附會則失之遠矣曹震
圭以三煞為絕胎養則絕胎養皆屬幽陰之地猶若可
通至以驛馬為五行將病得見妻子則妄謬已甚矣又
按驛馬有從年支取者有從日支取者其義例皆與月
同故不重列

劫煞



神樞經曰刼煞者刼害之辰也其日忌臨官視事納禮
成親戰伐行軍出入興販○李鼎祚曰正月起亥逆行
四孟

按月刼煞義與歲刼煞同

災煞

天獄

天火



按月災煞義與歲災煞同又按神煞起例亦有伏兵大禍五兵神煞與歲同例而歷家不特無伏兵大禍二神并無災煞其為闕遺固不待言但月主一月之事不必一一與歲同例其伏兵大禍可以弗論至於三煞斷難闕一自當依起例補足又按天獄正月起子順行四仲曹震圭以為天獄即是災煞應逆行四仲而今順行者流傳之誤也其說是今從之

天獄 天火

神樞經曰天獄者月中禁神也其日忌獻封章興詞訟
赴任征討

玉帳經曰天火者月中凶神也其日忌苫蓋築壘垣牆
振旅興師會親娶婦○歷例曰天火者正月在子順行
四仲

按天獄與天火向為正月起子順行四仲曹震圭以為
天獄即是月災煞以逆行四仲為是而天火仍順行四
仲其說曰寅午戌月在子蓋字中藏陽氣之火其勢最

弱待寅午戌月火勢興旺以顯其光故子中有霹靂火也是水中之火見之於天也亥卯未月在卯蓋卯中有伏燄之火也火氣既生於寅至卯而木旺反蔽其燄而成炭又待亥卯未月木再生之故卯內有鑪中火也申子辰月在午蓋午中有正旺之火其勢最大物莫敢侵其光反闇待申子辰月水勢將興反制其光上下俱明故午中有天上火也巳酉丑月在酉謂酉中有長生丁火如硫黃煤炭之類故待巳酉丑月金石之氣而再發

旺也故酉中有山下之火也且子中之陽火卯中之木
火午中之旺火酉中長生丁火莫非天道自然故以名
之觀曹震圭之論亦為近似但古人立義命名純一不
二使其宛轉推移兼收並舉納甲不得入於納音河洛
不得入於壬遁則無往而不可立說矣寅午戌火既取
子水申子辰水既取午火則亥卯未木必不取卯木而
取酉金巳酉丑金必不取酉金而取卯木可斷也子水
何以有火曰子中之火乃真火於人身驗之命門為真

火於海驗之無月之夜一海皆火蓋坎中一畫是為純陽故寅午戌之火局根於子也出乎震則為龍為雷而人乃見水中之火焉不知其不見者乃子水之天火也知乎此則申子辰水之以午為天火一而非二取左手以例右手可矣若夫木中有火鑽燧得之石為金母擊火出之金中有火摩軋亦生人所見也其不見者則為木之天火云木老則腐而火發焉即鑽木出火亦木敗而出火以自焚也木敗於金然則金者木之天火也金

老則生水矣若夫金之火金之少也石者未成之金也
少於金則火居焉土者又未成之石也又少於石則火
更散布漫衍於其中而草木生之又為火之母焉然則
木者金之天火無疑矣水火之中冬夏至也短長各極
而天火轉為一體金木之中春秋分也短長齊等而天
火轉居兩端此以見天地之道其相反者實一而神也
其相似者實兩而化也是故天火亦應逆行四仲又天
獄即災煞今用災煞天獄應刪

月煞

月虛



廣聖歷曰月殺者月內之殺神也其日忌停賓客興穿掘營種植納羣畜○歷例曰月煞者正月起丑逆行四季

季
樞要歷曰月虛者月內虛耗之神也其日忌開倉庫出財物結婚出行○歷例曰月虛者正月起丑逆行四季按在歲為歲煞在月為月煞無二義也圖說已見歲神唯又謂月虛者蓋亦以月建三合旺氣之對則必虛耗猶破日之又名大耗也

月刑



按月刑之義與歲刑同詳見歲刑條下

月害



神樞經曰月害者陽建所害之辰也所值之日忌攻城
野戰牧養羣畜結會親姻請醫巫納奴婢○歷例曰正
月起巳逆行十二辰○曹震圭曰月害者月中六害也
假令卯辰相害者卯以乙旺之木害辰墓之土辰以墓
土却害卯中癸水也寅巳相害者謂寅以旺甲害巳中
戊土而已以生庚害寅中旺甲也丑午相害者丑以癸
水害午中丁火午以巳土害丑中癸水也子未相害者
子以所生之辛金害未中墓木未以旺土害子中旺水

也申亥相害者亥以生木害申中生土申以旺金害亥
中生木又以生土害亥中旺水也酉戌相害者戌以墓
火害酉之旺金酉以所生丁火害戌中辛金也

考原曰六害者不和也凡事莫不喜合而忌衝正月建
寅與亥合而已衝之故寅與巳害二月建卯與戌合而
辰衝之故卯與辰害蓋月建者衆神之首衝其所合是
以害也

按六害之義考原得之震主非也年日六害皆同月害

取義故不重列

大時

大敗

咸池



淮南子曰斗柄為小歲月從左行十二辰咸池為大歲
正月建卯月從右行四仲終而復始大歲迎者辱背者
強左者衰右者昌小歲東南則生西北則殺不可迎也
而可背也不可左也而可右也大時者咸池也小時者
月建也○神樞經曰大時者將軍之象也所值之日忌
出軍攻戰築室會親○李鼎祚曰大時者正月起卯逆
行四仲○曹震圭曰大時者乃月建三合五行沐浴之
辰也蓋五行至此則敗絕是最凶之辰也故曰大凶之

時

按咸池大時神樞經有忌無宜曹震圭以為大凶之時
今考淮南本義則其義與歲神大將軍相似

遊禍



神樞經曰遊禍者月中惡神也其日忌服藥請醫祝神致祭○李鼎祚曰遊禍者正月起巳逆行四孟○曹震圭曰遊禍者三合五行臨官之神是對衝劫煞之位也○考原曰遊禍神者以其流行於四隅故曰遊以其過旺故曰禍

按天干以臨官為祿而地支以臨官為禍其義不同干陽也支陰也陽善而陰惡故陽以方旺為吉而陰以方旺為凶也歲方不忌陽刃而忌大煞義亦類此若夫成

定之吉則取日月三合不可與是同語矣

天吏
致死



樞要歷曰天吏者月中凶神也其日忌臨官赴任遠行
詞訟○歷例曰天吏者正月起酉逆行四仲○曹震圭
曰天吏者三合五行死氣之位五行至此死而無氣乃
天之凶吏全無生意也其忌可知

按天吏者三合之死氣也故又為致死司馬遷曰削木
為吏義不對漢酷吏尹賞且死戒子曰丈夫為吏正坐殘
賊免追思其功效則復進用矣一坐軟弱不勝任免終
身廢棄無有赦時蓋吏之心誠利人之死也為此名

者其為三代以下無疑矣如果天吏則必曰求其生而
不得則死者與吾兩無憾也奈何以致死辱天吏哉

六合

無翹




神樞經曰六合者日月合宿之辰也其日宜會賓客結婚姻立契券合交易○李鼎祚曰正月在亥逆行十二辰○考原曰六合者月建與月將相合也○天寶歷曰無翹者翹猶尾也陽鳥所主陰則無之常居厭後故曰無翹其日忌嫁娶○曹震圭曰翹猶首翹婦人之飾也無翹者是無其飾也故忌嫁娶

按六合月將太陽過宮並見本原及公規卷內惟是日又名無翹天寶歷以為烏尾曹震圭以為首飾其義亦

不足取矣蓋堪輿家最忌月厭故以厭前一辰為章光
厭後一辰為無翹其日皆忌嫁娶猶歲神之以歲前為
羅睺歲後為病符也夫月厭僅值一日非若方位之相
比連斷無因忌一日而并忌前後兩日之理且六合天
願皆宜嫁娶吉日又以為無翹而忌之母乃欺世而滋
惑乎俗士又名飛翹更屬譌繆應刪

兵吉




總要歷曰兵吉者月內用兵之吉辰也其日宜出師命將攻伐畧地○歷例曰兵吉者正月子丑寅卯二月亥子丑寅三月戌亥子丑四月酉戌亥子五月申酉戌亥六月未申酉戌七月午未申酉八月巳午未申九月辰巳午未十月卯辰巳午十一月寅卯辰巳十二月丑寅卯辰○曹震圭曰兵吉逐月漸退一辰者是兵家無有妄進無有躁動之意故云兵者不祥之器不得已而用之也又易卦師之六四曰師左次无咎言左次則為退

舍也故見可而進知難而退師之常也又太白陰經曰
未見而戰雖衆必潰見利而戰雖寡必勝是兵家不可
以妄舉輕進此陰陽之戒也

按兵吉者皆太陽後四辰也太陽前一位為月厭太陽
隔之則太陽之後一二三四皆厭所不到之地兵行之
吉道也常處太陽之後隨太陽以行則物莫敢犯者矣
其終於四者并太陽而為五則太陽為我軍之伍長也

五富



總要歷曰五富者富盛之神也其日宜興舉運動估市
經求○歷例曰正月起亥順行四孟○曹震圭曰五富
者月中餘盛之神也蓋寅午戌月火王喜亥中甲木而
生申子辰月水王愛巳中庚金而生亥卯未月木王求
寅木相助巳酉丑月金王求申中庚金相益故曰餘盛
此其義也

按五富者三合長生之六合也寅午戌火火長生於寅
亥者寅之合也亥卯未木木長生於亥寅者亥之合也

申子辰水水長生於申巳者申之合也巳酉丑金金長生於巳申者巳之合也生我之神居得合地則其益我者必多故曰五富也或曰當逆行四孟其說謂三合父母之長生也寅午戌火以木為父母木長生於亥亥卯未木以水為父母水長生於申申子辰水以金為父母金長生於巳巳酉丑金以土為父母土長生於寅生我之神既得長生則吉慶莫有大焉者也故以五富名之言無不足也九五福二曰富富固五福之一五福而皆

富有則洵乎其無不足也其說亦通故附存之

天倉



總要歷曰天倉者天庫之神也其日可以修倉庫受賞
賜納財牧養○歷例曰天倉者正月起寅逆行十二辰
○曹震圭曰倉者藏也月建私藏之神也蓋建寅之月
天地交泰陰陽各半而氣同故共藏於本建至二月陰
陽氣離則建事於前私藏於後故歷丑逆行至七月陰
陽否其氣又同陰陽各半亦同藏於申也

按太陽在亥則天倉在寅太陽在戌則天倉在丑每居
太陽後四辰然則天倉者太陽之收日也建後四辰為

收日神煞起例以收為天倉方可互觀而自得也收必有倉倉於何所必於其六合之地矣天倉在寅則亥為收日天倉在丑則子為收日然則天倉者又收之六合也若夫曹震圭建事於前收藏於後之說亦太支且遁矣

天賊




神樞經曰天賊者月中盜神也其日忌遠行○李鼎祚
曰天賊者正月在丑逆行十二辰○曹震圭曰天賊者
盜神也常居天倉後辰蓋倉庫之後必有盜也按天賊
者月厭之收日也常居厭後四辰月厭逆行天賊亦逆
行故建之平乃厭之收建所為前乃厭所為後也月厭
主陰私國語曰天事恒象厭所收必天賊矣

要安



樞要歷曰要安者月中吉神也所值之日宜安撫邊境
修葺城隍○歷例曰要安者正月寅二月申三月卯四
月酉五月辰六月戌七月巳八月亥九月午十月子十
一月未十二月丑也○曹震圭曰要安者要而用之可
得安也蓋陽建之月歷寅卯辰巳午未陰建之月歷申
酉戌亥子丑也如是則陽辰之月用陽氣通泰之辰陰
辰之月用陰氣柔和之辰類易卦之六爻剛柔相應之
象

玉字



樞要歷曰玉宇者月中貴神也所值之日宜修宮闕繕
亭臺結婚姻會賓客○歷例曰正月卯二月酉三月辰
四月戌五月巳六月亥七月午八月子九月未十月丑
十一月申十二月寅○曹震圭曰玉宇者月建所安之
室也卯酉者日月之門分界之位東南方陽位也為外
為前故陽建居之西北方陰位也為內為後故陰月居
之似人之居處男居於前女居於後也

金堂



樞要歷曰金堂者月中善神也所值之日宜營建宮室
興造修築○歷例曰正月辰二月戌三月巳四月亥五
月午六月子七月未八月丑九月申十月寅十一月酉
十二月卯○曹震圭曰金堂者建神安樂之堂也常在
玉宇之前似王公建修宅第之次序也

敬安



樞要歷曰敬安者恭順之神也所值之日宜睦親族叙尊卑納禮儀行慶賜○歷例曰敬安者正月未二月丑三月中四月寅五月酉六月卯七月戌八月辰九月亥十月巳十一月子十二月午○曹震圭曰敬安者是陰陽相會之義也陽會陰而必敬陰會陽而必恭若恭而敬必得安也蓋未申酉戌亥陰氣用事之辰故陽辰之月會之丑寅卯辰巳陽氣用事故陰辰之月會之子午陰陽爭故自會也其義如此

普護



樞要歷曰普護者神歷之神也所值之日宜祭祀禱祠
尋醫避病○歷例曰普護者正月申二月寅三月酉四
月卯五月戌六月辰七月亥八月巳九月子十月午十
一月丑十二月未○曹震圭曰普護者乃月中普護萬
物無偏私之神也常與要安相對蓋申酉戌亥子丑乃
陰權否室之位與陽建之月相配寅卯辰巳午未乃陽
氣通泰之位與陰建之月相配是月內陰陽暗有相護
之神也

福生



樞要歷曰福生者月中福神也所值之日宜祈福求恩
祀神致祭○歷例曰福生者正月酉二月卯三月戌四
月辰五月亥六月巳七月子八月午九月丑十月未十
一月寅十二月申○曹震圭曰福生者月內祈求福願
之神也故與玉宇相對謂玉宇為月建之所安向之則
所以邀福月建顧其所向亦所以造福也


聖心



樞要歷曰聖心者月中福神也其日宜上表章行恩澤
營百事○歷例曰聖心者正月亥二月巳三月子四月
午五月丑六月未七月寅八月申九月卯十月酉十一
月辰十二月戌○曹震圭曰勞而不敢安者聖人之心
也蓋陽辰之月順理陽卦之位陰辰之月順理陰卦之
位初寅之月起於乾宮亥者是順天之道也○考原曰
正三五七九十一為陽建之月故從亥至辰配乾坎艮
震四陽卦二四六八十十二為陰建之月故從巳至戌

配巽離坤兌四陰卦

光盤後



樞要歷曰益後者月中福神也所值之日宜造宅舍築垣墻行嫁娶安產室○歷例曰正月子二月午三月丑四月未五月寅六月申七月卯八月酉九月辰十月戌十一月巳十二月亥○曹震圭曰益後者於子嗣有補益之神也子丑寅卯辰巳為陽氣之位以陽建之月配之午未申酉戌亥為陰氣之位以陰建之月配之陰陽會和既生男女當夫訓其男婦教其女使男從夫道女從婦道各從其道當有益於將來故云益後

續世
血忌

血忌



樞要歷曰續世者月中善神也所值之日宜結婚姻睦
親族祀神祇求嗣續○歷例曰續世者正月丑二月未
三月寅四月申五月卯六月酉七月辰八月戌九月巳
十月亥十一月午十二月子是也○考原曰按續世者
月中繼續之神也常在益後後一辰蓋亦與玉宇金堂
之相連者同意○又按自要安至續世凡九神其起例
皆以六陰月與六陽月對衝如正月寅則二月申正月
卯則二月酉是也餘倣此

九神總論

右要安以下九神皆以對衝兩兩相比或陽月陽陰月陰或陽月陰陰月陽從寅月寅起至寅月丑止取其九位而去其寅月巳午戌三位不用或又以寅月從巳午戌起如例歷十二辰者為龍虎為罪至為受死皆為凶神而以此九位為吉神雖有其例而莫名其物眾說紛然皆不明確夫神之有凶吉也皆本年月日神所喜所忌之陰陽五行以為斷或以三合五合言或以六合六

冲言或以納音納甲言或以卦位方位言或以旺相休
囚言千變萬化要皆不離乎此而此以寅申卯酉兩兩
相比以命十二辰則皆不可得而符合也史記漢武帝
時有五行家堪輿家建除家叢辰家歷家天人家太一
家聚訟不決各守其師傳而不相下彼時術家之多如
此今則統歸於歷家其說之傳者皆斷爛蒙昧莫尋其
端緒堪輿建除五行歷家猶可意揣而命之若叢辰等
家之言則更莫可考也今此九神與堪輿建除五行歷

家之旨俱不符合意者其叢辰等家之遺緒歟而傳之最久歷代相沿不廢用於禱祠鬼神而亦為建造等事之吉日唯歷神原始則曰此九神專為祈禳而設今觀其命名之義且參之禮記柔日剛日之旨其說殆近是歟存之以為祭祀擇日之占而樞要歷所言上表章修造諸事者並不復用若夫龍虎罪至受死三辰並仍舊歷從刪夫既以九神為吉則餘三不用可知不必重立名目也又按神煞起例以龍虎罪至為天地爭雄日由

此觀之九神為禱祀鬼神而設益驗蓋巳午者陰陽之交也故有天地爭雄之目而又南方正位也故與幽則有鬼神之義相反其戌之為受死者亥為陽氣剝盡之會而乾之純陽居之以首萬物此陰陽之妙義六壬之以壬名而不曰六甲者此也亥既為首則戌必居終故以戌為受死也然此特以六陽六陰十二辰從寅輪轉而命之云爾若自寅而卯以至于丑逐月論之則義並不可遁夫唯鬼神之道有其始之即要其終不若人事


之顯著事各一理而不可稍有差忒也故曰宜祭祀之
吉辰庶幾近之○要安言徼福於鬼神也金堂玉宇神
所居也修祠立廟之類用之內神以金堂而外神以玉
宇也敬安安神位之日也普護福生聖心泛禱之日也
益後續世祠高禩之日也

陽德



總要歷曰陽德者月中德神也所值之日宜交易開市
結親姻○歷例曰正月起戌順行六陽辰○曹震圭曰
陽德者乾陽之道也陽道不可以盡剝故正月起戌應
乾之上九戌者乾之世爻又五月一陰生即配於午順
歷乾之六爻六陽月居於寅午戌火炎上為尊為夫也
六陰月臨於申子辰水潤下為卑為婦也故所值之日
長幼有序夫婦有別是嘉會合禮之辰故宜如此

陰德




總要歷曰陰德者月內陰德之神也所值之日宜施陰
陽行惠愛雪冤枉舉正直○歷例曰正月起酉逆行六
陰辰○曹震圭曰陰德者是月中坤陰之道也正月起
於酉應坤之上六酉者坤之世爻故從酉逆歷坤之六
爻坤者厚德載物也含弘光大萬物資生故宜如此

按陽德乾六爻之納甲也陰德坤六爻之納甲也卯酉
者日月也各從卯酉起初爻以歷十二辰陽德卯月乾
初子陰德卯月坤初未陽德辰月乾二寅陰德辰月坤

二巳陽德巳月乾三辰陰德巳月坤三卯陽德午月乾
四午陰德午月坤四丑陽德未月乾五申陰德未月坤
五亥陽德申月乾上戌陰德申月坤上酉而六爻各一
終矣復自酉至寅以次順列焉從卯至申生萬物者也
從酉至寅成萬物者也帝出乎震而復生焉生生不已
也夫乾坤以生萬物成萬物為職而其用在日月今六
陽六陰從卯酉順布天施地生之象備矣陽曰陽德陰
曰陰德言陰陽之德皆在於生成萬物也其日必吉

天馬



神樞經曰天馬者天之驛騎也其日宜拜公卿擇賢良
宣布政事遠行出征○李鼎祚曰天馬者正月起午順
行六陽辰○曹震圭曰天馬者是乾體六陽用事之神
也易曰乾為馬

按乾卦納子寅辰午申戌天馬則四十月在子四月乾
卦十月建亥又乾宮也午為馬詩曰吉日庚午既差我
馬說者謂午為馬祖之神寅申為道路午起寅順歷六
陽辰則申又得午取象於馬之用也

兵禁




總要歷曰兵禁者用兵凶辰也其日忌出師振旅闋武
教戰○歷例曰兵禁者正月起寅逆行六陽辰○曹震
圭曰兵家所利者陰道也所忌者陽道也故兵禁正月
起寅逆行六陽辰也又月令曰孟春之月不可稱兵稱
兵必天殃兵戎不起不可從我始故正月以寅為禁辰
也二月子相刑四煞也三月戌耗破之辰也四月申四
煞三刑也五月午自刑也六月辰天罡四煞也七月寅
破耗三刑也八月子四煞死神也九月戌河魁也十月



申六害也十一月午破耗也十二月辰四煞天罡也其忌可知

按易曰地中有水師說者謂伏至險于大順之中王者之師所以有征無戰也兵禁則與卦義相反夫坎之六爻納甲寅辰午申戌子也今自坎之初爻翻轉至上倒行而逆施之是以其至險顯然橫行于天下矣若由乾坤以日月為用之義推之則卯月起坎上爻逆行而下豈非坎之所為上六失道凶三歲者乎從上而至初係

用徽纆而入于坎窞豈非兵之大禁歟

地囊





歷例曰地囊者正月庚子庚午二月癸未癸丑三月甲子甲寅四月己卯己丑五月戊辰戊午六月癸未癸巳七月丙寅丙申八月丁卯丁巳九月戊辰戊子十月庚戌庚子十一月辛未辛酉十二月乙酉乙未○曹震圭曰月令云孟春之月天氣下降地氣上騰天地和草木萌動蓋草木者震也故易云動萬物者莫疾乎雷故正月震納甲為地囊也仲春之月雷乃發聲蟄蟲咸動啟戶始出當養生者德莫比坤故二月用坤之納甲為地

囊也季春之月時雨將降下水上騰覆育萬物莫大於天故用乾之納甲也孟夏之月農乃登麥聚畜百藥靡草死蠶事畢能烜燥萬物者莫燠乎火故四月用離之納甲也仲夏之月陰陽爭死生分霽祀山川百源設坎壇無用火南方故使萬物潤澤者莫潤乎坎故五月地囊用坎之納甲也季夏之月不可以興土功土潤溽暑大雨時行燒薙行水利以殺草如以熱湯可以糞田疇可以美土疆以配中央之位故用坤之納甲也孟秋之

月農乃登穀萬物有成用始行戮故易曰萬物之所以成終而所以成始也莫盛乎艮故用艮之納甲也仲秋之月務蓄菜勸種麥雷乃收聲蟄蟲坏戶陰浸盛陽日衰莫說乎澤故用兌之納甲也季秋之月蟄蟲咸俯在內皆墮其戶霜始降草木黃落農事備收五穀之實藏帝藉之收于神倉是萬物之所收藏也莫勞乎坎故用坎之納甲也孟冬之月天氣上騰地氣下降閉塞而成冬水始冰地始凍雉入大水為蜃虹藏不見反動於下也故

用震之納甲也仲冬之月水益堅地始坼芸始生荔挺
出蚯蚓結土事無作陰陽爭諸生蕩萬物潔齊故用巽
之納甲也季冬之月數已終歲更始水澤腹堅修耒耜
耦耕具田器出土牛以送寒氣其德厚載而致役者莫
大乎坤故用坤之納甲也

按地囊乃四時三合卦之納甲蓋三合無土局而土旺
於四季木火金水之所以生旺墓者無適非土故用當
時三合卦內外兩初爻之納甲為地囊日其八卦兩用

者則再用世應二爻之納甲日春木亥卯未局為震坤
乾卦正月用震內卦初爻庚子外卦初爻庚午二月用
坤內卦初爻乙未外卦初爻癸丑三月用乾內卦初爻
甲子外卦初爻壬午夏火寅午戌局為離乾艮卦四月
用離內卦初爻巳卯外卦初爻巳酉五月用乾世爻壬
戌應爻甲辰六月用艮內卦初爻丙辰外卦初爻丙戌
秋金巳酉丑局為兌艮巽卦七月用兌內卦初爻丁巳
外卦初爻丁亥八月用艮世爻丙寅應爻丙申九月用

巽內卦初爻辛丑外卦初爻辛未冬水申子辰局為坎
巽坤卦十月用坎內卦初爻戊寅外卦初爻戊申十一
月用巽世爻辛卯應爻辛酉十二月用坤世爻癸酉應
爻乙卯今世傳歷例二月乙未謫癸未三月壬午謫甲
寅四月巳酉謫巳丑五月謫戊午戊辰六月謫癸未癸
巳七八月互易丁亥謫丁卯九月謫戊辰戊子十月謫
庚戌庚子十一月辛卯謫辛未十二月癸酉謫乙酉乙
卯謫乙未曹震圭不辨其誤曲為之解而愈不能通今

推其義而改正之蓋舊本傳寫謬誤四十八字中誤二十三字亦天願之類也

土符



總要歷曰土符土神也其日忌破土穿井開渠築牆○
歷例曰土符者正月丑二月巳三月酉四月寅五月午
六月戌七月卯八月未九月亥十月辰十一月申十二
月子○曹震圭曰土符者乃土地握符信之神使掌五
土也假令春木旺土受其尅故托子金以制之是春三
月歷巳酉丑也夏火旺土休賴火為母以養之故夏三
月歷寅午戌也秋金旺土相不畏木制故秋三月歷亥
卯未也冬水旺土亦剛堅賴水以柔和之故冬三月歷

申子辰也

按曹震圭以土符為符信之義似也而以夏為土休秋為土相則于五勝之義舛焉夫天之生物皆地生之者也故十二辰無非土也萬物生於東旺於南收于西藏于北而由北而東則土之所以終萬物始萬物者也由南而西則土之所以盛美昌熾夫萬物者也由西而北則土之所以伏藏保固夫萬物者也寅巳申亥長生之位則以丑寅卯辰為其長生之符子卯午酉帝旺之位

則以巳午未申為其帝旺之符辰未戌丑收藏之位則以酉戌亥子為其收藏之符故曰土符也其有所忌者亦猶月建之為土府尊之故不敢犯也

大煞



神樞經曰大煞者月中廉察也所值之日忌出軍征討
嫁娶納財豎柱上樑移徙置室○李鼎祚曰大煞者正
月在戌二月在巳三月在午四月在未五月在寅六月
在卯七月在辰八月在亥九月在子十月在丑十一月
在申十二月在酉○曹震圭曰東方之位生育萬物南
方之位成熟萬物西方之位殺伐萬物北方之位收藏
萬物大煞者月中廉察也子丑寅月歷西方申酉戌者
蓋謂陽氣將出萬物將生故巡察西方無以妄殺也卯

辰巳月歷南方巳午未者謂萬物生長之時故巡察南方使有成熟也午未申月歷東方寅卯辰者謂萬物成熟宜在養育也酉戌亥月歷北方亥子丑者謂萬物收成使有斂藏也

按月之大煞即歲之飛廉其義亦相同見第三卷

歸忌



廣聖歷曰歸忌者月內凶神也其日忌遠行歸家移徙娶婦○歷例曰孟月丑仲月寅季月子○曹震圭曰子者一陽丑乃二陽寅乃三陽蓋此三辰陽氣始盛主動於外不可反歸於內也○考原曰孟月忌丑仲月忌寅季月忌子者皆忌退後一辰所謂歸忌也如子為仲丑為季寅為孟故孟月忌退歸於季仲月忌退歸於孟季月忌退歸於仲也

後漢書郭鎮傳曰陳伯敬行必矩步坐必端膝還觸歸

忌則止寄鄉亭注曰陰陽書歷法曰歸忌日四孟在丑
四仲在寅四季在子其日不可遠行歸家及徙也然則
歸忌之說其來舊矣曹震圭與考原所云俱有理而其
旨未暢蓋子一陽也丑二陽也寅三陽也陽主進陰主
退今丑退於子寅退於丑卯退於寅是逆陽之道也故
為歸忌餘月倣此又按歸忌與飛廉同義子丑寅為支
辰之始子旺之始也丑墓之始也寅生之始也寅申巳
亥四生之月歸忌在丑是忌生之退歸於墓也卯午酉

子四旺之月歸忌在寅是忌旺之退歸於生也辰未戌
丑四墓之月歸忌在子是忌墓之退歸於旺也故其日
忌遠迴移徙廣聖歷謂并忌嫁娶者蓋以婦人謂嫁曰
歸而忌之夫謂嫁曰歸明從夫之義云耳非遠行之歸
也易漸卦彖辭曰女歸吉漸進也非退也詩曰女子有
行行亦進也非退也漢書注及他通書亦無忌嫁娶之
說應止忌般移遠迴不忌嫁娶

徃亡




堪輿經曰往者去也亡者無也其日忌拜官上任遠行
歸家出軍征討嫁娶尋醫○歷例曰往亡者正月在寅
二月在巳三月在申四月在亥五月在卯六月在午七
月在酉八月在子九月在辰十月在未十一月在戌十
二月在丑○曹震圭曰往亡者往而不反之意也孟者
初也仲者中也季者末也蓋歲之始中終之意也正二
三四月乃歲之初皆以四孟辰為之乃五行初生之地
是生氣之道往而亡也五六月乃歲之中皆以四

仲辰為之蓋四仲者五行當旺之辰是旺氣之道往而亡也九十十一十二月乃歲之終皆以四季辰為之謂四季者乃五行終墓之地是萬物皆歸往而亡也

按通書曰宋武帝以往亡起兵軍吏以為不可帝曰我往則彼亡果克之由此言之可廢明矣今按陰陽之義無非慎微謹始以昭欽若之忱不必以一事之無驗而遽謂其可廢也亦思其理之當否而已往亡者寅午戌火月順行寅卯辰卯未亥木月順行巳午未辰申子水

月順行申酉戌巳酉丑金月順行亥子丑火性遂於木
水性遂於火水性遂於金金性遂於水水生火而火焚
木金生水而水沉金蓋無尅則生不生無制則化不化
無貞則元不能以起也故曰往亡也微乎深哉

氣往亡



歷例曰氣往亡者立春後七日驚蟄後十四日清明後
二十一日立夏後八日芒種後十六日小暑後二十四
日立秋後九日白露後十八日寒露後二十七日立冬
後十日大雪後二十日小寒後三十日皆自交節日數
之。曹震圭曰氣往亡者以四立月往亡日三合化象
之成數為之假令正月立春寅為往亡寅午戌合火局
火之成數七也四月立夏卯為往亡亥卯未合木局木
之成數八也七月立秋酉為往亡巳酉丑合金局金之

成數九也十月立冬未為往亡土無化象便以本行土為之其成數十也各倍之為次月往亡日三之為下月往亡日也獨水數不用者蓋四立之月往亡無申子辰日也然一歲之內四季之月以辰為首辰月以申為往亡申合水局水之成數六也故三月中氣後六日九月中氣後十二日六月土旺後十二日十二月土旺後十八日各得往亡或節氣早晚間有差一日者然其理大槩如此

按氣往亡日曹震圭之說亦自巧合但專取孟辰則四方與三合彼此互異且既取三合之氣又不以未為木而以為土未免自相牴牾今以四時五行之序推之則固自然之數也蓋一二三五行之生數也六七八九十五行之成數也一六為水水即氣也氣以終而復始往而不亡者也火木金土則有質矣其氣乃有時而盡而一二三四五為生數至而伸者也七八九十為成數返而歸者也故七八九十為往亡日而以四時之序配


之立春七立夏八立秋九立冬十仲月為四時第二月
故二之為仲月往亡日季月為四時第三月故三之為
季月往亡日

欽定四庫全書



卷六

上朔



堪輿經曰上朔日忌宴會嫁娶遠行上官○歷例曰陽年以年干加寅順數至亥陰年以年干加丑順數至巳也○曹震圭曰丑寅者艮卦之方也萬物始終之所也已者陽極之辰亥者陰極之辰故陽有生發萬物之功者寅也陰有成終萬物之道者丑也以陽而來會於極陰以陰而往會於極陽則非其相會之道也其忌可知按上朔日為不吉者惡其陰陽與德俱盡也陽盡於亥陰盡於巳干盡於十如甲年以甲為德甲至癸而十甲

年之癸而又臨於亥則癸為德盡亥為陽盡也乙年以庚為德庚至巳而十乙年之巳而又臨於巳則巳為德盡巳為陰盡也餘可類推其以上朔名者朔有始義又有盡義尚書平在朔易正義曰朔盡也

反支



後漢書王符傳曰公車以反支日不受章奏注曰反支
日用月朔為正戌亥朔一日反支申酉朔二日反支午
未朔三日反支辰巳朔四日反支寅卯朔五日反支子
丑朔六日反支見陰陽書也○歷例曰其日忌上表章
按反支之義惡其將盡也戌亥朔本日即支將盡矣申
酉朔則在二日午未朔則在三日胥同此例也推此而
言則結婚納財等事亦必有應忌者而歷例止言忌
上表章蓋古之陰陽書傳者蓋少而今歷例則轉據後

漢書公車不受奏章而言忌上表章也

四離 四絕

玉門經曰離者陰陽分至前一辰也謂建卯之月陽氣出陰氣入建子之月陰氣降陽氣升建酉之月陰氣出陽氣入建午之月陽氣降陰氣升故先一日為四離辰也○李鼎祚曰此日忌出行征伐○曹震圭曰四離者冬至前一日水離夏至前一日火離春分前一日陽體分而木亦離也秋分前一日陰體分而金亦離也故名曰四離

玉門經曰四絕者四立前一辰也○李鼎祚曰此日忌
出軍遠行○曹震圭曰立春木旺水絕立夏火旺木絕
立秋金旺土絕立冬水旺金絕故先一日為絕也

月忌日


歷例曰月忌日止註祭祀宴會沐浴整容剃頭整手足
甲求醫療病補垣掃舍宇修飾垣牆平治道塗破屋壞
垣餘事不註○齊東野語曰俗以每月初五十四二十
三日為月忌凡事必避之其說不經後見衛道夫云聞

前輩云此三日即河圖之中宮五宮五數耳五為君象故民庶不可用此說頗有理○通書曰俗忌初五十四二十三以五黃值日配廉貞火生起中宮之土也其法每月初一日起一白水入中宮與貪狼木相配水木相生也初二日二黑土與巨門土相配比和也初三日三碧木能制祿存土也初四日四綠木與文曲水相生也初五日五黃土配廉貞火火加中宮之土火生土旺火晦土湮而已初十十九又起一白貪狼至十四二十三

又值五黃廉貞前輩云此俗忌之日有吉星可用○考
原曰九宮之次自一白至九紫九星之次一貪狼二巨
門三祿存四文曲五廉貞六武曲七破軍八左輔九右
弼故其相配如此又以其日為九五之數自初一至初
五五數也自初五至十四自十四至二十三皆距九日
世不敢用故忌也

按月忌之義中宮五黃之說皆為得之而廉貞生土之
說則不可信今宮殿衙署有穿堂坐向用正子午家居

則不敢用又以太歲為堆黃煞皆避尊也以卑犯尊則
凶非以其為廉貞也月忌之義亦猶夫是國家亦不用
是日者國有事必及臣民故亦不用也



欽定協紀辨方書卷六